


Kata-Kata Iban Tarasul



TAUSUG

NASUL

Kata-Kata Iban Tarasul

LEGENDS AND BALLADS

by
Seymour and Lois Ashley
and
Caesar Taga

Illustrations by
Nathaniel T. Tianero

NASULI LIBRARY



Summer Institute of Linguistics-Philippines, Inc.
Translators **Publishers**

1973

PREFACE

This anthology of reading material is intended for newly literate Tausug people to help them develop fluency and comprehension in reading. The book is named after two of the articles presented. One is a Kata-kata or Tausug legend. One is the story of the Patriarch Joseph put into the form of a Tausug ballad--a tarasul. The first three articles are divided into short sections and include comprehension questions and fluency drills. The last four, designed for more advanced readers, have no helps.


The compilers would appreciate any critical comments concerning this book and any contributions which may prove useful in future publications.

Literacy Committee
Summer Institute of Linguistics
Nasuli, Malaybalay,
Bukidnon, Philippines

HATULAN SIN LUUN
Table of Contents

BATA-BATA BANG-BANG (The Cookie Child)	Kata-Kata	1
HI DUPANG-DUPANG (The foolish One)---as told by Salip Bayang	Kata-Kata	25
PASAL KITA DI TANDUGUN (Concerning not Getting Malaria)	Pahati	47
PIYAAWN SIN TUHAN IN DUNYA IBAN LANGIT (God Creates the World and Sky)	Kitab Tawrat	83
DAHAN PAGTAYMANGHUD (The Way of Brotherhood)	Kitab Injil	91
NAMINTANG IN BULAUG (The Prodigal Learns a Lesson)	Kitab Injil	97
TARASUL PASAL HI NABI YUSUP (Story of Prophet Joseph in rhyme)--- composed by Mrs. Dianhua Tan	Kitab Tawrat	103

Batà-Batà BANG-BANG





1 Bahagi Panagnaan

Awn duwa magtiyaun.
Nagbay ha higad kabbun.
In ngan hi Bapà kay Babù.
Mag-usaha landù matuyù.
Nasusa hi Babù kay Bapà.
Way anak minsan batà-batà.

Awn hambuuk adlaw naghinang
hi Babu bang-bang.

"Nasusa aku," laung niya, "Way
duun anak ku tumabang.

Mag-unu na kami kay Bapa,
bang way anak namu dakula?

Bang di na makaig ha kulangan,
way na minsan maraak maghinang."




"Pag-ubus ku addun in bang-bang
hiluun pa kahà hibuwang.

Pag-ubus ampa ku lukuban.
Subay isab malutù ampa ukaban."



Nalutù mayan in bang-bang,
nagtuy hi Babù iyukaban.
Landù tuud siya kiyublaan,
Pagkità niya limaksu dimagan.



Pangasubu ha bahagì panagnaan:

Kiyahatihan mu in piyagbacha mu?

1. Hariin hi Bapà kay Babù
naghulà?
2. Unu in hinang hi Babù hambuuk
adlaw?
3. Nag-unu in bangbang pag-ukay
hi Babù sin kaha?
4. Hinda siyu in nasusa sin way
anak?


Lag kamu sin manga bichara ini.

ha higad kabbun

way anak nila

Ukabun ku na

Miyaguy siya



2 Bahagi Hikaruwa

Laung hi Babù, "Unu yan?"
Laung sin bang-bang, "Aku ini
bang-bang."

Timawag hi Babù kan Bapà,
"Uwà, Bapà, landu aku kimublà.

Yaun na in bang-bang miyaguy
pa lupà.
Biyà dagbus batà-batà."



Na, dimagan hi Babù kay Bapà
imapas.
Sà dì sila makaatu ha bang-bang
magtatas.

In bang-bang landù mabiskay.
Sà hi Babù kay Bapà minuwì
pa bay.

Magtuy in bang-bang dimagan pa
lawm lupu.

Sakali kita niya in tau
nag-aararu.


Timawag in bang-bang pa
nag-aararu.

In bissara niya mag-abbu-abbu.

"Uwà, yari na aku miyaguy, timuyù,
dayn kan Bapa iban hi Babu.

Mabiskay aku dayn kaniyu.

Di na aku abutan, minsan hisiyu."





Na, imapas in tau nag-aararu.
Di makaabut, sabab maalistu.
Masi magdaragan ha gitung dan.
Iban paglingi harap pa ulihan.


Pangasubu ha bahagi hikaruwa:

Kiyahatihan mu in piyagbacha mu?

1. Maybahà hi Babù kimublà?
2. Di makaatu hi Babù kay Bapà mag-unu?
3. Biyà diin in bissara sin batà-batà bang-bang pa nag-aararu?
4. Di siya kunù unuhun minsan hisiyu?
5. Ha unu hi batà-batà bang-bang nagdaragan?

Lag kamu sin manga bichara ini.

Aku ini bang-bang
miyaguy pa lupa
hi Babù kay Bapà
landù mabiskay
minsan hisiyu



3

Bahagi Hikatu

Magtuy niya kita in tau
naghihinang bay.
Timawag in bang-bang, laung niya
"Uwà, bagay.

Yari na aku miyaguy timuyù,
dayn kan Bapa iban hi Babù.

Iban sin tau nag-aararu miyasù,
di sila makaabut kakù.


Mabiskay aku dayn kaniyu.
Di na aku abutan minsan hisiyu."

Na, dimagan na in manga tau
naghihinang bay.

Di sila makaabut pa bang-bang,
sabab mabiskay.

In bang-bang masi nagdaragan
ha gitung dan.

In katan imapas kiyahunitan,
sabab walà da siya kiyaabutan.




Magtuy niya kità in inà manuk.
Timawag in bang-bang iban
paghibuk.

"Uwà, yari na aku miyaguy, timuyù
dayn kan Bapà iban hi Babù.

Iban sin tau nag-aararu miyasù,
di sila makaabut kakù.

Sampay tau naghihinang bay
imapas da isab simulay.

Mabiskay aku dayn kaniyu.
Di na aku abutan, minsan hisiyu."



Na, imapas na in inà manuk
makasay.
Di siya makaabut ha bang-bang
sabab mabiskay.

In bang-bang masi dimaragan
ha gitung dan.
In katan imapas kiyahunitan,
sabab walà da siya kiyaabutan.



Pangasubu ha bahagi hikatu:

Kiyahatihan mu in piyagbacha mu?

1. Unu in kità sin batà-batà
bang-bang, amu in tiyawag niya
bagay?
2. In katan imapas ha batà-batà
bang-bang kiyaunuhan?
3. Maytà?
4. Unu in kità niya timawag siya
iban paghibuk?
5. Unu in imapas makasay?

Lag kamu sin manga bichara ini.


naghihinang bay

dì sila makaabut

dimagan na in manga tau

miyaguy timuyù

Dì na aku abutan



4 Bahagi Hikaupat

Magtuy, na dimatung in bang-bang
pa sapà.

Awn irù natutug duun himapà.

Laung sin bang-bang,

"Bati kaw kakà.

Yari aku miyaguy dayn kan

Babù kay Bapà.

Dayn ha tau nag-aararu iban

naghihinang bay,


iban ha ina manuk aku limabay.

Daha aku pa hanṣipak sin sapà,
ha supaya aku di mabasà."

Sakali miyangun na in irù.
"Huun," laung niya,
"laksu na kaw, Utù.

Di kaw ha taykud ku pangurà,
ha supaya ta kaw hikahatud pa
liyu sapà."


Magtuy na in bang-bang limaksu.
Niyat niya in irù biyà kurà
pasu.



Limanguy na in irù pa lawm sapà
"Agara," laung niya, "in agi ku
bat kaw di mabasà.

Sung kaw pa u ku. Ayaw mabugà,
bat kaw di makalugum pa lawm
sapà."

Simung in bang-bang harap pa
unahan.
Ha babaw na sin u in piyanguraan.





Naglalanguy naman in irù
dumihil tulung.

"Mabasà na kaw, Utù.
Sung kaw pa ilung."

Nagkahagad in bang-bang
simibug-sibug.
Ha ilung sin irù nangurà
timutug.


Naglalanguy naman in irù, way
na hugnà.

"Sibug-sibug kaw, Utù," laung
niya, "harap pa dilà, bat kaw di
makalugum pa lawm sapà."

Na, simung na in bang-bang
pa dilà miyanghad.

Sakali nagtuy siya sin irù
tiyanhab.

Ampa na kiyansangan kiyaun.
Walà tuud hiyundungan sampay
natun.



Pangasubu ha bahagì hikaupat:

Kiyahatihan mu in piyagbacha mu?

1. Dimatung pakain in bang-bang?
2. Unu in kītà niya duun ha diyatungan niya?
3. Unu in ngan tiyawag niya ha irù?
4. Unu in kabayaan niya ha irù?
5. Ha unu siya nangurà?
6. Unu in kiyatub-tuban sin batà-batà bang-bang?

Lag kamu sin manga bichara ini.

Awn irù natutug

Batì kaw kakà

biyà kurà pasu

Simung in bang-bang

Mabasà na kaw

Hi DUPANG-DUPANG



HI DUPANG-DUPANG

1

Awn duwa magtiyaun hi Kabayan kay Miskinan. Hati in anak nila duwa. Karuwa sila, amu magulang, in Taga Akkal. In hambuuk, amu in manghud, Dupang-Dupang.

Manjari miyawn hi Apù Sawragal. Magpabus in Sawragal madtu ha Sultan, pilak. Tu sila kànuman pilak.

Manjari magbugsay sila dayn ha adjung pa lupà Bisayà.

Manjari didtu man sila ha lawd. Malayù na sila. Nakakità na sila mag-idlap ha lawd. Laung sin Dupang-Dupang, "Patujuha kita madtu. Kumà kita tulak bahalà." Manjari dì mabayà in Taga Akkal humapit. Na laung sin Dupang, "Bang dì mabayà humapit ha bud tumbaga, na palanjalun na."

Timulak na sila isab. Sakali, nakakità sin mag-idlapputi. Laung sin Dupang, "Humapit na kita kumawà tulak bahalà bud pilak." Dì mabayà in Taga Akkal.

Manjari timulak na sila isab.
Awn kakitaan mag-idlap marayaw tuud.
Laung sin Dupang, "Humapit kita kumawà
tulak bahalà, bud intan." Manjari di
mabayà in Taga Akkal. Timulak na sila
magbalik. Nakaratung pa lupà Bisayà.

Pagdatung nila timukad pa gimba
hi Sawragal iban hi Taga Akkal.
Naglawag sila usaha maghinang dan.

Manjari in Dupang-Dupang walà
piyaagad. Duun siya ha adjung.



Bassaha niyu in pangasubu ampa sulatan
in jawab niya ha gudlis iyuumbulan.
Ubus bassaha in jawab.

1. Nag-unu hinda Dupang-dupang?
2. Hi siyu sila in timulak?
3. Timulak sila pakain?

(1) _____ hinda (2) _____
iban hi _____,
iban hi _____
pa (3) _____.

Manjari natutug siya. Nakarungug siya naghiluhala. Pagbatì niya, "Unu," laung niya, "in naghiluhala?"

Laung sin tau, "Irù, kiyut-kut in batà-batà."

Laung niya, "Gaban kamu mari pa taas adjung. Hukumun ta kamu. Bayaran ku lima pilak bang man dì bunuun in irù."

Natug na siya isab. Pagtug niya nakarungug na isab hiluhala. Sakali kiyaun in istà sin ambaw. Bunuun na isab sin tau. Laung niya, "Gaban naa kamu mari. Hukumun ta kamu. Hain kamu mabayà, sin ambaw iban sin lima pilak?"

Laung niya, "Mabayà aku sin lima pilak."

Manjari natug na siya isab nagbalik. Nakarungug na isab naghiluhala nagbalik. Laung niya, "Unu yan?"

Laung sin tau, "Kwan, ini, batà-batà kiyamas sin kuting."

Laung niya, "Kari kamu, hukumun ta kamu. Magpi kamu sin maig in kuting

iban sin lima pilak."

Laung sin tau, "Mabayà kami sin lima pilak."

Natug na isab siya nagbalik. Nakarungug na isab naghiluhala. Laung niya, "Unu yan?"

"Batà-batà ini," laung sin tau, "kiyut-kut sin buaya."

"Manjari" laung niya, "hukumun ta kamu. Magpi kamu sin maig in māngut-kut iban sin lima pilak."

Laung sin tau, "Mabayà kami sin lima pilak."

Nakauwì na mawn in magulang niya, hi Taga Akkal iban hi Apù Sawragal. Manjari imasubu siya bang nakabaak da hinang. In agi sin Sawragal, "Way." Pagkità sin magulang niya hi Taga Akkal sin nami hi Dupang-Dupang sin irù, iban ambaw, iban kuting, iban buaya, biyugit siya piyabin ha lupa Bisaya. Timulak na sila.

Bassaha niyu in pangasubu ampa sulatan
 in jawab niya ha gudlis iyuumbulan.
 Ubus bassaha in jawab.

1. Unu in bini hi Dupang-dupang?
2. Pagdatung hi Taga Akkal kay
 Sawragal, iyunu nila hi Dupang?

Bini hi Dupang-dupang in

(1) _____,
 _____, iban _____.

Sakali (2) _____ siya.

Didtu na hi Dupang-Dupang ha lawm dagat iban irù niya, iban ambaw niya, iban kuting niya, iban buaya niya. Nagbichara in ambaw niya iban irù niya, iban kuting niya, iban buaya niya, bang biyà diin in kauwì sin Dupang.

Sakali miyadtu in buaya pa apù niya. Nagbichara sila, "Bang bukun hi Dupang, patayun na aku sin tau. Biyayaran hi Dupang lima pilak bang mayan aku di da bunuun sin tau." Miyanaw na madtu kan Dupang in apuan nila. "Hiyatud ta kaw muwì."

Simakat hi Dupang iban irù ha taykud niya. Dimagan na in Apù Buaya ha babaw dagat. Nakauna sila dayn kan Sawragal iban Taga Akkal. Pagdatung nila ha higad, yaun na in amà hi Dupang, in Miskinan. Manjarì nangasubu na siya, "Hariin hi Taga Akkal?" Laung niya, "Biyugit niya aku."

Nagdihil in Apù Buaya sing-sing. "Unuhun in sing-sing ini?" laung sin Dupang.

Laung niya, "Magpusakà aku kaymu Hilaruk mu pa taas makapitu, pitung

kabud bulawan. Ampa na isab hilaruk mu pa taas da, pitung kabud pilak. Diin in taas sin kalarukan mu amu taas sin biyuran niya."

Na ubus minuwi na siya pa bay. Nagtawag siya ha inà niya, hi Kabayan, iban amà niya, Miskinan, magganti sin pilak, kànuman pilak. Maubus ampa dahun magbichara in sultan. Mabayà mag-asawa ha anak niya hi Dupang. Laung sin sultan, "Taymaun. Mag-ungsud siya pitung kabud bulawan iban pitung kabud pilak." Minuwi na in Kabayan. Nagsusa. Ipunun in anak niya hi Dupang sin sultan. Nag-asubu na hi Dupang kan inà niya bang siya nataymà sin sultan. Laung niya, "Nataymà, sà mahunit. Mag-ungsud kita pitung kabud bulawan iban pitung kabud pilak."

Nagpanaw na sila madtu, hi Dupang iban inà niya, Kabayan. Laung sin sultan, "Ikaw na," laung niya, "in Dupang?"

Laung sin Dupang, "Aku na."

"Mabayà na ha anak ku mag-asawa?"

Laung sin Dupang, "Mabayà."

"Mag-ungsud na," laung niya,

"Mag-ungsud na," laung niya,
"pitung kabud bulawan iban pitung
kabud pilak." Liyaruk na sin Dupang
in sing-sing niya pa taas. Nakapitu
liyaruk. Pitung kabud bulawan.

Na, kiyawn na sila sin sultan.
Nagtiyaun na sila. Duun na sila
nagtiyaun malugay.



Bassaha niyu in pangasubu ampa sulatan
 in jawab niya ha gudlis iyuumulan.
 Ubus bassaha in jawab.

1. Unu in dihil hi buaya kan Dupang-dupang?
2. Hipag-unu in pitung kabud bulawan
 iban pitung kabud pilak?
3. Hisiyu in tiyaunun hi Dupang-dupang?

Piyakay hi Dupang-dupang in

(1) _____

dihil hi buaya supaya siya makabak

(2) _____

ha (3) _____

Na, nakaingat na in tukang mananasal bulawan bang biyà diin dagbus sin sing-sing. Piyakità niya ha tukang yadtu. Sakali giyantian sin tukang. Ampa siya minuwì.

Pag-uwì niya nasakit in Dupang. Nagkawà siya mangungubat. Gam man matay in Dupang. Naabut kapatan tag-upat mangungubat, nagda siya napas.

Nagbichara na in kuting niya, iban ambaw niya, iban irù niya.

"Biyà diin," laung sin kuting ha ambaw iban irù, bang mapatay hi Dupang? Makanat na kitaniyu."

Laung sin kuting, "Panawun natù in tukang. Kaun natù in sing-sing." Nagpanaw sila. Nakaabut na sila pa dagat.

Laung sin kuting, "Makatatas kaw maglanguy, Irù?"

Laung niya, "Makatatas."

"In ikaw," laung niya, "Ambaw, makatatas?"

"Bang aku," laung niya, "in laulun maglanguy, lumaksu aku pa

taykud mu, Irù. Laulun aku ha taykud sin irù, lumaksu aku pa taykud sin kuting."

Naglanguy na sila sin sadlup sin suga. Nakaratung pa bay sin tukang tungà dum. Pagdatung nila madtu maghali-hali sila. Ubus man sila maghali-hali limaksu in ambaw pa taas bay sin tukang. Siyam pangkat in bay sin tukang. Didtu ha kasiyam in bulawan ha lawm sin patti basi. Kiyabahuan sin ambaw. Magbing na siya madtu pa kuting nagbaytà na siya, laung niya, "Ha lawm sin patti basi."

Laun sin kuting, "Biyà diin in dakmul?"

"Marakmul," laung niya.

"Mauk kut-kutun mu sin ipun mu in basi?"

Laung niya, "Mauk."

Gimaban na siya magbalik pa taas sin bay. Ampa niya kiyut-kut in patti basi. Nabali in ipun niya hansipak. Nagbing siya madtu pa kuting. Nagbaytà siya ha kuting, "Nabali in ipun ku hansipak."

Laung niya, "Awn pa ipun mu?"

Laung niya, "Yari pa in hansipak."

"Bing kaw madtu kut-kuta sin hansipak."

Nabalì na in hansipak. Nakasud siya pa lawm patti basi. Nakawà niya na in sing-sing hi Dupang. Limaksu siya pa lupa. Nagbaytà siga ha kuting, "Yari na."

Laung sin kuting, "Hisiyu in duma?"

Laung sin irù, "Aku. Aku in dakulà?"

Laung sin kuting, "Bang awn karungugan sakayan iban makakità tau iban manuk-manuk, di kaw umusig?"

Laung sin iru, "Dì."

Nagbing sila isab. Pagkwan, diyagit sin manuk-manuk. Imusig in irù. Natanak in sing-sing. Laung sin irù, "Natanak, kuting!"

"Kusug kamu languy pa higad!"

Bassaha niyu in pangasubu ampa sulatan
 in jawab niya ha gudlis iyuumbulan.
 Ubus bassaha in jawab.

1. Naunu hi Dupang-dupang?
2. Unuhun sin ambaw, kuting, iban irù
 in patti basì sin tukang?
3. Hipag-unu sila ha sing-sing?

(1) _____ hi Dupang-dupang.

(2) _____ sin ambaw, kuting
 iban irù in patti basì sin tukang

(3) _____ ha sing-sing.

Nakaratung na sila pa higad
naghali-hali pa sila.

Laung sin kuting, "Unu," laung
niya, "kunsum?"

Laung sin irù, "Sabtù."

Laung sin kuting, "Pa tabù kita
kunsum."

Miyadtu sila pa daig tabù ha buli
sin kahuy dakulà. Laung sin kuting,
"Kadtu kaw pa tabù."

Piyakadtu in irù pa tabù. "Kitaa
bang awn istà kulapu pula. Bing kaw
mari."

Nagbing na in irù. Awn nakità
istà. Laung sin kuting, "Malaggù?"

Laung sin irù, "Sarang-sarang."
Nagaagad isab nakatu.

Laung sin kuting, "Didtu kaw ha
daig sin istà maglukù. In kami di ha
tungud sin tabù."

Ampa limaksu in ambaw iyapas sin
kuting. Nagdagan na sila pa lawm tabù.
Nagpun in tau nagkità sin ambaw iban
kuting nag-apas. Tiyangà sin irù in
istà. Diya na pa buli sin kahuy
dakulà. Ampa dimagan na isab in ambaw

iban kuting. Laung sin kuting, "Nara mu in istà?"

Laung sin irù, "Nara."

Laung sin kuting hipakut-kut ha irù in tiyan sin istà. Nakawà nila in sing-sing ha lawm tungul sin istà. Ampa na na sila minuwì.

In ambaw ha taas biyubungan. In irù harap pa sawm bay. In kuting harap madtu pa Dupang. Manjari tībù sin tau in kuting hi Dupang.

Laung sin asawa hi Dupang, "Ayaw pagtibua ipatan niya." Limukù in kuting pa tiyan hi Dupang. Ampa liyuwà in sing-sing pa lima hi Dupang.

Na, nabuhì hi Dupang.



Bassaha niyu in pangasubu ampa sulatan
 in jawab niya ha gudlis iyuumbulan.
 Ubus bassaha in jawab.

1. Iyunu sin kuting in ambaw.
2. Unuhun sin irù in sing-sing.
3. Maunu hi Dupang-dupang.

(1) _____ sin kuting in ambaw
 ha supaya (2) _____ sin irù in
 sing-sing hipag-ulì kan Dupang-dupang.
 Hangkan da (3) _____ hi
 Dupang-dupang.

Ini in jawab sin pangasubu:

Bahagì 1:

(1) Timulak hinda (2) Dupang-dupang,
iban hi Taga Akkal, iban hi Apù
Sawragal pa (3) hulà Bisaya.

Bahagì 2:

Bini hi Dupang-dupang in (1) irù,
ambaw, kuting iban buaya. Sakali
(2) biyugit siya.

Bahagì 3:

Piyakay hi Dupang-dupang in (1) sing-
sing, dihi hi buaya supaya siya
makabak (2) hipag-ungsud ha (3) anak
sin sultan.

Bahagi` 4:

(1) Nasakit hi Dupang-dupang.

(2) Panawun sin ambaw, kuting iban iru`
in patti` basi` sin tukang (3) hipagka`
ha sing-sing.

Bahagi` 5:

(1) Iyapas sin kuting in ambaw ha
supaya (2) kaun sin iru` in sing-sing
hipag-uli` kan Dupang-dupang. Hangkan
da (3) mabuhì hi Dupang-dupang.

Pasal sin dì Kita Tandugun





PASAL SIN DÌ KITA TANDUGUN

I

Yari hi Abdul, anak hi Baldani.
Tiyatandug hangkan siya kimukulang ha
baluy. Miyamantahan siya sabab sin
tandug niya makansang tuud.

Yari isab hi Baldani iban sin
asawa. Nasusa sila sabab sin way
makatabang kanila.

* * * * *

There is Abdul, the son of Baldani. He has
malaria, that is why he is lying on the mat. He
has a blanket wrapped around him because his
malaria is severe.

There is Baldani also, and his wife. They
are worried because there is no one to help.



Sakali awn tau miyawn pa bay nila. Pangdaig nila, hi Musa in ngan. In agi kanila, "Maytà kamu?" In sambung hi Baldani, "Nasusa kami sabab hi Utù tiyandug iban hinglaw." Nasusa isab hi Musa kanila. Amu agi, "Sumung-sung yan bang kumù-kù na in pasù sin baran niya, daha niyu pa duktur."

* * * * *

Then there is a man going up into their house. He is their neighbor, Musa is his name. He said to them, "What is the matter?" Baldani replies, "We are worried because Utù has malaria and is feverish." Musa is sorry for them and says, "Later when his temperature goes down, take him to the doctor."



Pagga mahapun na, in kusug sin tandug hi Abdul gimam-gam na. Sà in baran niya malamma pa. Dì pa siya makakaya. In maas niya mabayà magda kaniya pa duktur, sà way pa sīn hibi ubat. Laung hi Baldani ha asawa, "Dayang, mangistà pa aku ha supaya kita makabaak sīn hibi ubat. Kunsum madtu kitaniyu pa duktur."

Sambung sin asawa niya, "Marayaw pa kita madtu na pa duktur minsan sukay sadja in kabakan ta sabab awn nagbaytà kakù way ra kunù bayad bang ha huspital sin malariya. Atasan sin parinta in manga ubat hikarihil."

* * * * *

By afternoon, Abdul's malaria attack had let up, but his body was still weak. He wasn't yet strong. His parents wanted to take him to the doctor, but they didn't yet have money to buy medicine. Baldani said to his wife, "Dear, I will go fishing now and get some money to buy medicine. Tomorrow we will go to the doctor."

His wife replied, "Its better if we go to the doctor now even if its only the fare that we will find because someone told me that we don't have to pay if its at the malaria control office. Because the government assumes responsibility for the medicine which is to be given."

I

Lawaga niyu in sulat amu in
makabaytā kaniyu sin bunnal ka in
manga bissara ini atawa bukun bunnal.

1. Nagkukulang hi Abdul sabab
nasasakit siya.
2. Walā nasusa hi Baldani iban asawa
niya.
3. Hi Musa amaun hi Baldani
4. Pag-ubus niya kiyugdan sin tandug,
malamma pa hi Abdul.
5. Laung sin asawa hi Baldani, "Atasan
sin parinta in manga ubat
hikarihiḷ."




II

Pag-ubus sin duktur kità iban
iksamin hi Abdul, amu agi pa maas hi
Abdul, "Bunnal awn tandug niya iban
hangkanda siya tiyandug bakas siya
nakut-kut sin hila. Bang siya walà
nakut-kut sin hila di siya tandugun.
Marayaw tuud bang di makut-kut sin
hila."

* * * * *

After the doctor has examined Abdul, he says to the parents, "Yes, he really has malaria, and the reason he has malaria is that he has been bitten by a mosquito. If a mosquito had not bitten him he could not have got malaria. It is better not to get bitten by mosquitoes."



"Na," laung hi Baldani, "Biyà diin kaagi ha supaya kita di kut-kutun sin hilaam? Mataud tuud hilaam ha lungan namù." Sakali hinduan hi Baldani sin dukter ha supaya sila di kut-kutun sin hilaam. Pag-ubus sila hinduan, dihilan sila ubat tandug.

* * * * *

"Now," says Baldani, "how can we possibly avoid being bitten by mosquitoes? There are lots of mosquitoes at our place." Then the doctor teaches Baldani how they can avoid being bitten by mosquitoes. After being taught, they buy malaria medicine.



Pagdatung nila pa bay, minum hi
Abdul tu ubat tandug. Sampay pa adlaw
hambuuk tu da isab in inum niya.
Sabab amu ini in biyandà sin duktur
kanila hipahinang.

* * * * *

On arriving home Abdul takes three malaria
pills. Then on the next day he takes three also,
because that is what the doctor told him to do.

II

Lawaga niyu in sulat amu in
makabaytā kaniyu sin bunnal ka in
manga bissara ini atawa bukun bunnal.

1. Iksamin sin duktur hi Abdul.
2. Sakali laung sin duktur subay hi
Abdul tugsukun.
3. In agi sin duktur hilaṁ in magdarā
sin tandug.
4. Walà nasusa hi Baldani sabab way
hilaṁ ha hulà nila.
5. Pag-uwì nila pa bay mīnum hi Abdul
sin ubat niya makaminsan.



III

Laung hi Baldani pa hambuuk tau
maas ha pangdaig niya, "Bapà in
kitaniyu tau maas subay kitaniyu
mag-isun. Sabab awn hibaytà ku kaniyu
pasal sin agi kakù sin duktur subay
kitaniyu himinang ha supaya kitaniyu
dì tandugun. Iban halli` ini ha manga
anak taniyu ha supaya dì matay sin
tandug."

* * * * *

Baldani says to the senior man who is his neighbor, "Uncle, we older people should get together for a meeting. The reason is that I have something to tell all of you, that the doctor told me. He told me what to do in order that we all would not get malaria. And we should do this to guard our children in order that they not die of malaria.



Nagsusuy-suy naman hi Baldani pa
manga tau, "Laung sin duktur tandugun
kita bang kita makut-kut sin hila.
Hangkan na in manga tau biyà katù
naghuhulà ha higad subay matug ha lawm
sin kulambù bat kita dī makut-kut sin
hila. Amu agi sin duktur, minsan kita
miskin subay kitaniyu mami kulambù. Dī
yan hikaluppas sin sīn ta."

* * * * *

Baldani continues, "The doctor says that we
get malaria because of being bitten by a mosquito.
That is why people like us who live near the shore
should sleep under a mosquito net so that we won't
be bitten. The doctor says even though we are
poor we should buy a mosquito net. That will not
be a waste of money."

III

Lawaga niyu in sulat amu in
makabaytà kaniyu sin bunnal ka in
manga bissara ini atawa bukun bunnal.

1. Laung hi Baldani pa hambuuk tau
maas, "Bapà in kitaniyu tau maas
subay kitaniyu mag-isun."
2. Sakali kiyalupahan hi Baldani bang
unu in piyahinang sin duktul.
3. In kulambù makatampan ha tau dayn
ha kut-kut sin hila.
4. In sakit tandug makarihil kamatay
ha batà-batà.
5. Bang kaw magbi kulambù kausibaan
sadjà in sīn.



IV

Iban laung hi Baldani, "In agi sin duktur, bang adlaw, timatapuk in hila ha sawm bay atawa ha sawm kantil. Duun sila tumapuk haunu-haunu in malindum. In hati niya," laung hi Baldani, "bang magpara mari in parinta tau magsumpit pa bay ta iban sin lassun DDT subay ta sila di langun. In sumpit yan hikapatay sin katan hila."

* * * * *

Baldani also says, "The doctor said that in the daytime the mosquitoes hide under the houses or under the beds. They hide wherever it is dark. That means," said Baldani, "that when the government sends men to spray the house with the poison DDT we should not prevent them. That spray is to kill all the mosquitoes."



"Na," laung hi Baldani, "bang sawpama awn tau mari pa lungan ta magkità sin dugù ta, subay ta sila palanjalun sabab in gawi nila, kitaun nila in dugù ta bang awn kagaw tandug ha dugù ta. Amu in kagaw sin tadung ha baran ta in makatandug katù. Bang nila kakitaan awn kagaw ha dugù ta ubatan nila kita magtuy sin ubat tandug, way bayad."

* * * * *

"Now," says Baldani, "if for example someone comes to the village to take a test of our blood we should let them. Their purpose is to examine our blood to see if there are malaria germs in it. It is malaria germs in our bodies that cause us to have malaria. If they see that we have these germs in our blood, they will medicine us with malaria medicine without charge."

IV

Lawaga niyu in sulat amu in
makabaytà kaniyu sin bunnal ka in
manga bissara ini atawa bukun bunnal.


1. Bang dum tumapuk in hila.
2. Kabayaan sin hila sin sìnag sin
suga.
3. Matay in hila sin lassun DDT.
4. Bukun marayaw magpakità sin dugù
ha duktul bang awn tandug.
4. Mataas in bayad sin ubat tandug.



Na, adlaw-adlaw mangistà na hi Baldani. Adlaw-adlaw tumañ siya hambuuk lupiya atawa hambuuk pilak ha supaya sila makabi kulambù dakulà pagtugan nila iban sin manga anak-asawa niya. Dì na sila pagkut-kutun sin hila sabab awn na kulambù nila. Hisiyu-siyu kamu subay kamu isab mami kulambù.

* * * * *

Now every day Baldani fishes. He saves every day one half-peso piece or one peso in order that he can buy a large mosquito net to sleep under with his wife and children. They will not be bitten by mosquitoes because he has a mosquito net. Whoever you are you should buy a mosquito net.



Bang in tau mangistà labayan dum
pa pù subay magda kulambù pagtugan,
awla-awla na ha manga pù biyà Sulari.
Mataud tuud hila.

Makug na tuud hi Baldani iban
anak-asawa niya. Iban isab sin
pangdaig niya, makug na sabab way na
tandug nila.

* * * * *

If a person fishes and passes the night on
the islands he should take a mosquito-net to sleep
under, even more so to the islands like Sulari.
There are plenty of mosquitoes.

Baldani is happy now and his wife and
children. Also his neighbors are happy because
they don't have malaria.

Lawaga niyu in sulat amu in
makabaytā kaniyu sin bunnal ka in
manga bissara ini atawa bukun bunnal.

1. Nagtaẖ hi Baldani sīn hipami
kulambù.
2. In tau taga akkal matug ha lawm
kulambù.
3. Minsan ha pag-iistaan in tau
kut-kutun da sin hilaam.
4. Kiyugan in katan sabab in sakit hi
Abdul nakarihil kanila pamintangan
maghallī dayn ha tandug.
5. Katan tau awn kulambù.

Piyaawn sin Tuhan in
Dunya Iban Langit



PIYAAWN SIN TUHAN IN DUNYA IBAN LANGIT

In tagnaan tuud sin waktu awal jaman piyaawn sin Tuhan in langit iban lupa. Sakali wayruun ha lawm sin dunya iban di kaingatan in dagbus niya bang biya diin. Andum in ha babaw sin tubig, iban in tubig malawm. Miyamanaw in nyawa sin Tuhan duun ha babaw niya.

Manjari nagparman in Tuhan. Laung niya, "Maawn na in sawa." Na, saruun-duun naawn na in sawa. Pagkità sin Tuhan, marayaw na. Sakali kiyandi niya in sawa iban tigidlum. Ngiyanan niya in sawa "adlaw" ampa in tigidlum ngiyanan niya "dum". Dayn ha mahinaat pa mahapun jimukup na hangka adlaw.

Manjari nagparman na isab in Tuhan. Laung niya, "Maawn na in ayan ha gitungan sin tubig ha supaya makandi in tubig ha taas iban tubig ha babà." Sakali, nahinang na, saruun-duun. Hinang sin Tuhan in ayan iban kiyandi niya in tubig ha babà sin ayan dayn ha tubig ha taas sin ayan. Ngiyanan niya in ayan, "langit". Dayn ha mahinaat pa mahapun amu na in adlaw hikaruwa.

Manjari nagparman na isab in Tuhan. Laung niya, "Matipun na in tubig amu in ha babà sin ayan ha supaya gumuwà in lupà." Na, saruun-duun nahinang na. In lupà ngiyanan niya, "gumi" ampa in tubig, amu in natipun niya, ngiyanan niya "dagat". Sakali, pagkità sin Tuhan sin hinang niya, marayaw na.

Manjari, nagparman na isab in Tuhan. Laung niya, "Maawn na ha lupà in manga kasagbut-sagbutan iban na sin manga tiyanum awn bigi kaniya-kaniya. Maawn na isab in manga kakahuy-kahuyan magbubunga. Ginisan sin bunga taga bigi, kaniya-kaniya agad ha pihak niya. Sakali, saruun-duun nahinang na. Timubù na ha lupà in manga kasagbut-sagbutan iban na sin manga tiyanum ginis-ginisan awn bigi, kaniya-kaniya agad ha pihak niya. Timubù na isab in manga kakahuy-kahuyan magbubunga. Ginisan sin bunga taga bigi, kaniya-kaniya agad ha pihak niya. Manjari, pagkità sin Tuhan sin hinang niya, marayaw na. Dayn ha mahinaat pa mahapun amu na in adlaw hikatu.

Manjari, nagparman na isab in Tuhan. Laung niya, "Maawn na ha taas sin langit in manga masawa, ha supaya makandi in adlaw iban dum. Pamandugahan

na sin manga musim iban sin manga
adlaw iban sin manga tahun. Sila na isab
in manga ilaw dayn ha taas langit
magdihil sawa pa dunya." Sakali,
saruun-duun nahinang na. Hinang sin
Tuhan in duwa sawa dakulà. In hambuuk,
amu in dakulà tuud, nahinang niya
puntukan sin adlaw, ampa in sumunud,
nahinang niya puntukan sin dum. Hinang
niya isab in manga bituun. Biyutang
niya pa taas langit ha supaya dimihil
sawa pa dunya, ha supaya sila in
puntukan sin adlaw iban putukan sin
dum iban ha supaya kandihun in sawa
dayn ha tigidlum. Sakali pagkità sin
Tuhan, marayaw na. Dayn ha mahinaat
pa mahapun, amu na in adlaw hikaupat.

Manjari, nagparman na isab in
Tuhan. Laung niya, "Maawn na in
manga baanan mataud, unu-unu na katan,
sasuku sin taga napas iban lumanguy ha
dagat. Maawn na isab in manga
kamanuk-manukan lumupad ha taas,
ha gitung sin langit iban lupà."
Sakali, piyaawn sin Tuhan in manga
sattuwa dakulà ha dagat, iban sin
baanan, unu-unu na katan, taga napas
mananap atawa lumanguy ha dagat,
kaniya-kaniya agad ha pihak niya.
Piyaawn niya isab in katan-tan kamanuk-
manukan ginis-ginisan taga pik-pik,

kaniya-kaniya agad ha pihak niya. Na, pagkità sin Tuhan sin hinang niya, marayaw na. Biyarakatan sin Tuhan in manga piyapanjari niya. Laung niya, "Pataura," laung niya, "in manga panubù niyu ha supaya kamu tumaud iban malatag niyu in dagat. In kamu isab," laung niya, "manga manuk-manuk, subay kamu tumaud ha lawm sin dunya." Manjari dayn ha mahinaat pa mahapun amu na in adlaw hikalima.

Manjari, nagparman na isab in Tuhan. Laung niya, "Maawn na ha lupà in manga kasattuwa-sattuwan ginis-ginisan agad ha pihak nila. Sasuku sin taga napas, manga kahayup-hayupan, manga mananap ha lupà, iban na sin manga sattuwa ha lawm katian agad ha pihak nila." Sakali, saruun-duun naawn na. Piyaawn sin Tuhan in manga sattuwa ginis-ginisan ha lawm sin katian agad ha pihak nila. Piyaawn niya isab in manga kahayup-hayupan ginis-ginisan agad ha pihak nila, damikkiyan da isab in manga mananap ha lupà kaginisan katan, agad ha pihak nila. Sakali, pagkità sin Tuhan sin hinang niya, marayaw na.

Manjari, nagparman in Tuhan nagbalik. Laung niya, "Paawnun taniyu in manusiyà sumupu katù, ha

supaya sila mabiyà katù. Dihilan ta sila kawasà magkabayaan ha manga istà ha dagat, ha manga manuk-manuk maglupad, iban ha manga sattuwa. Dihilan ta sila kawasa isab magkabayaan ha katiluagan sin dunya. Sampay pa manga katan mananap ha lupà kapagbayaan nila."

Manjari, saruun-duun piyaawn sin Tuhan in manusiyà sumupu kaniya. Piyaawn niya in tau, usug iban babai, sumupu kaniya. Dihilan sila isab barakat sin Tuhan. Laung sin Tuhan kanila, "Pataura," laung niya, "in mang panubù niyu ha dunya, ha supaya kamu tumaud iban malatag niyu in dunya. Kamu na in makapag-agi sin katiluagan dunya. Kapag-agihan niyu in manga istà ha dagat iban na sin manga manuk-manuk. Kapag-agihan niyu in manga unu-unu na katan taga napas iban miyamanaw ha babaw sin dunya.

Na, nagparman in Tuhan nagbalik. Laung niya ha tau, "Taynghug kamu," laung niya, "Hirihil ku kaniyu in tiyanum katan ha katiluagan sin dunya amu in manga tiyanum taga bigi, pagkaun niyu. Hirihil ku kaniyu isab pagkaun niyu, in manga kakahuy-kahuyan katan magbubunga, amu in taga bigi ha bunga niya."

Nagbichara pa in Tuhan. Laung niya, "Hirihil ku ha manga sattuwa katan ha lawm sin katian, ha manga manuk-manuk maglupad, iban ha manga katan-tan unu-unu na mananap ha lupa, sasukù sin taga napas, hirihil ku kanila pagkaun nila, kasagbut-sagbutan iban karahun-dahunan katan." Sakali, naagad na in bichara sin Tuhan. Iban pagkità sin Tuhan sin piyapanjari niya katan-tan, marayaw na, kiyaamuhan siya tuud. Na, dayn mahinaat pa mahapun, amu na in adlaw hikaunum.

Dahan Pagtaymanghud



Dāhan Pagtaymanghud

Manjari awn hambuuk waktu miyadtu in guru sarà agama kan Isa. Sulayan hi Isa سوالن. "Tuwan Guru," laung niya, "unu in hinangun ku ha supaya aku pusakaan sin Tuhan sin kabuhi salama-lama ha adlaw Ahirat ha ukum-milik niya?"

"Bang ikaw," laung hi Isa, "unu in in daakan kiyasulat ha lawm sin sarà naug dayn kan Nabi Awla Musa? Biyà diin in panghati mu?"

In sambung niya laung niya, "Wajib kunu subay ta tibuukun in lasa ta ha Panghu ta Allahu Taala. Subay pus-pus in lasa ta kaniya dā dayn ha lawm pikilanta, dayn ha lawm atay ta, iban dayn ha panghati ta, sampay kusug ta katan. Iban subay in lasa ta ha pagkahi ta biyà da sin lasa ta ha baran ta."

"Amu na," laung hi Isa, "Kimugdan na in sambung mu. Bang mu, kahagarun in daakan yan, tantu mabuh kaw salama-lama."

Manjari in kabayaan sin guru sarà agama di siya segdahun hi Isa. Pangkan na siya simual and agi, "Tau biya diin

na siya simual amu agi, "Tau biyà diin bahà in pagkahi ku subay lasahun ku?"

Simambung isab hi Isa, laung niya, "Hajaratan ta kaw. Awn hambuuk tau Yahudi limud dayn ha Awrusalam madtu pa Ariha. Sakali liyangpasan siya sin manga tau mangi. Hiyubuan pa siya iban binasa siya, ampa siya binin sin manglalangpas ha ut sin kabuhi iban kamatay. Sakali, timaghà awn hambuuk imam, tau Yahudi, limabay dayn duun. Sagawà pagkità niya ha tau liyangpasan simikù siya pa hansipak sin dan limabay dayn ha kalayuan. Damikkiyan da isab in hambuuk bilal, pagkahi niya Yahudi, pagkità niya timangkis da siya isab pa hansipak sin dan.

Malayngkan awn hambuuk tau Samaritan, bangsa dugaing amu in kaastulan sadja sin manga Yahudi. Pagpanaw niya kiyalanggalan niya in tau yaun iban pagkità niya limuuy tuud siya. Kiyadtu niya in tau, iyubatan in pali sin lana iban alak ampa niya piyutus. Piyasakat pa taas sin hayup niya ampa diya pa hambuuk bay paghantian. Ipat niya marayaw.

Pag-adlaw hambuuk sung niya na manaw kimuut siya sin ampa dihil pa

tau ha tagdapu sin paghahantian. "Ipata siya marayaw," laung niya, "pila-pila na in hikabalanja mu labi dayn sin sin ini, bayaran ku kaymu paghapit ku ha uwi ku."


"Na," laung hi Isa ha guru sarà agama, "Ha pikil mu hi siyu dayn kanila tu, in nakahinang sin hinang dahan pagtaymanghud?"

"Ha pikil ku," laung niya, "amu in limuuy kaniya."

"Amu na!" laung hi Isa. "Kadtui na. Hinang na kaw sin bihadtu!"

Namintang In Bulaug





NAMINTANG IN BULAUG

Manjari siyunuan hi Isa in bichara niya, laung niya, "Awn hambuuk tau taga anak duwa usug. Namūng in kamanghuran pa amà niya, "Amà," laung niya, "dihilan na kākū in sukū ku sin altà hipusakà mu kāmū. Sakali biyahagi sin amà ha duwa anak niya in altà niya.

Liyabayan pilay adlaw piyagdangang sin manghud in altà niya. Miyanaw siya pa hulà malayū diyarā in sin. Dittu mayan iyusibaan niya in sin piyagbulaug. Naubus niya katān piyamaranjā. Sakali timaghà naggutum ha lawm hulà. Kiyasigpitan na tuud siya. Sà siya nagpaipun ha hambuuk tau ha hulà yaun amu in taglupà ha gimba. Dihilan siya hinang mag'ipāt sin babuy didtu ha gimba. In hapdi niya, mabayà siya kumaun minsan amu in kakaun sin babuy iipāt niya sà way da makarihil kaniya.

Ha kahinapusan nakapamintang na siya. Nakabaak siya pikilan marayaw. Laung niya, "Mataud in tau giyagadjihan hi amà. Jukup in pagkaun nila iban labi-labihan pa. Manjari in aku ini

maray na mautas sin hapdi. Magbalik na aku madtu kan Amà. Laung ku kaniya, "Amà nakarusa na aku pa Tuhan iban mawn kaymu. Di na aku, Amà, tupun tawagun anak mu. Niyata na aku biyà hambuuk tau giyagadjihan mu."

Na, puas siya nagpikil bihan nagtuy siya minuwì madtu kan Amà niya. Sakali malayù pa pa bay kiyakitaan na sin amà. Nag'anud'anud in lawm atay sin amà niya pagkità. Dimagan siya magtuy madtu giyulgul niya na iban siyum.

Amu agi sin anak, "Amà, nakarusa na aku pa Tuhan sampay mawn kaymu. Di na aku tupun tawagun mu anak."

Sagawà tiyawag sin amà in manga daraakun. "Us'us kamu," laung niya. "Dahi niyu mari badjù amu in marayaw tuud, ampa niyu sùlugaan mawn kaniya. Sùlugi sing-sing in lima niya iban siki sùlugi tawmpà. Pag'ubus kawaa niyu madtu in sapi bagal ampa niyu sumbayà. Magkug-kuyag kitaniyu iban magpajamu, sabab in anak ku inj, in niyat ku, patay na, sakali buhì da siya. Bakas siya nalawà dayn di kākù, sakali bihaun minuwì na siya. Na, naglami-lami na sila sin nakauwì na.

Manjari ha waktu yadtu didtu in anak niya magulang ha uma. Iban paguwi niya dayn ha uma masuuk na siya pa bay hi amà niya kiyarungugan niya na in pagkalang iban sin pagpangalay. Nagtuy niya tiyawag mawn kaniya in hambuuk daraakun iyasubu bang unu in piyagلامي-لامي. "Na, kaingatan mu, Tuhan, nakauwi na in manghud mu dayn ha panawan. Piyasumbay na hi Amà mu in sapi bagal sabab nakauwi na in anak niya way naunu."

Na, iyakigan na in magulang. Di siya minsan gumaban pa bay. Kiyadtu siya sin amà niya hiyupuuhupuan. Sagawà simambung siya laung niya, "Kitaa ba, Amà, bukun na pila tahun in aku nagtagipun kaymu. Way daakan mu kākū nalipas, minsan hambuuk in di ku mahinang. Manjari unu in pahalà mu kākū? Wayruun. Way minsan hambuuk kambing dihil mu kākū supaya aku makapagلامي-لامي iban sin manga bagay ku. Sagawà in anak mu yan, amu in nangusibà sin katān altà mu, dihil niya pa manga baḡai mangi palangay, bang siya makauwi na hipasumbay mu magtuy in sapi bagal."

Manjari simambung na in amà, laung niya, "Utù," laung niya, "in

ikaw yan yari kaw dī kākū tutug iban
wayruun altà ku in bukun kaymu.
Sagawà dī manjari bang dī magpajamu
iban magkug-kuyag sabab in manghud mu
biyà sapantun siya miyatay, nabuhì
nagbalik. Nalawà siya dayn kātū,
bihaun yari na siya nakauwì, way
naunu."

Tarasul Pasal Hi Nabi Yusup



TARASUL PASAL HI NABI YUSUP

PAHATI

Tagnaan ku Bismilla
iban salam duwaa.
Awn ini sarsila
pasal nabi sin masa.

In sarsila biyaktul,
hīnang biyà tarasul.
Bang marayaw kausul,
dungugun makahansul.

Duun niyu kabakan
ha Kitab awal jaman
ha jud panagnaan
ha Kitab Tawrat pagnganan.

Ha bab katluan tagpitu pa kàpatan tag-unum,
in sarsila pasal sin gutum.

Way timubù panghiyanum.

Way kabakan kakaun.

Amu in gutum pitu tahun,

way kakaun lawagun.

Sà Tuhan in nagpaawn.

Hi Nabi Yusup nanabang duun.

Hi Yusup tau Kanaan,

sug-sug apù hi Nabi Ibrahim.

Siya in napl sin Tuhan,

dihilan kalagguan.

In gutum ini limahil

didtu ha hulà Misir.

In tau nag-iiggil

miyadtu kaniya nagsurindil.

Hangkan siya dihilan kalagguan
duun ha Misir iban ha Kanaan
sabab siya in nakara sin daakan
dayn ha Tuhan.

In kiyarihil kan Yusup kalagguan,
napî siya Nabi sin Tuhan.
Siya in nakalapas timabang
ha pitu tahun gutum liyabayan.

KAWL-PIIL HI YUSUP

Hi Yusup batà marurug.
Anak siya hi Yàkub
Hangpù tagtu sila magtaymanghud.
Ha Kanaan in hulà tungud.

Hi Yusup waktu subul,
hangpù tagpitu tahun in ummul,
hambuuk siya batà mahatul.
Malanù in piil-kawl.

Hangpù tagtu sila magtaymanghud.

Hangpù tagduwa in usug.

Sà in magpalanggungan tuud,

hi Benjamin kay Yusup.

Hangpù tagtu sila nagtapil,

dayn ha upat babai nagpalahil.

Sà in marayaw pamikil,

hi Yusup malanù in kawl-piil.

Hi Benjamin in kamanghuran,

dayn kanila katan.

Sà dayn ha kamatauran,

hi Yusup in kalasahan.

Hi Yusup in kaugan tuud,

sabab siya batà matutug.

Way kabaakan lingug,

bang hinduan dumungug.

In taymanghud niya nangdà-dà,
sabab hi Yusup in piyabibiddà.
Hinangan siya sin amà
tamungun, indajinis in walnà.

TAGAINUP HI YUSUP

Nanagainup hi Yusup sin dum.
Awn bulan, suga, iban manga bituun.
In hangpò tag-isa bituun timuntun
pa tungud niya. Makahaylan aturun.

Ampa in sila katan magtaymanghud,
nagbutuk sila sagbut mataud.
In katan biyutuk sin manga taymanghud,
harap pa sukò niya simujud.

Tiyaawil in tagainup biyaytà,
hi Yàkub nila amà,
amu agi, "Yusup, ikaw in makapalihalà
ha manga taymanghud mu, inà, amà."

In manga magulang niya nagtipun,
nangabughù way na liyuhun.
Ubus, ampa sila nag-ísun,
hi Yusup subay patayun.

In manga magulang niya katan,
sàbu didtu ha gulangan,
nag-iipát sila sin buyan,
amu in bili-bili pagnganan.

Hi Yusup diyaak sin amà
pa manga magulang niya kimità.
Pag-ubus pauwiun pa hulà,
in hinang hipabaytà.

Miyadtu na siya nanglunsulan
limawag ha manga kataymanghuran.
Duun tuud sila iyabutan,
sàbu ha pagpanayaman.

Manga magulang niya diyugalan.
Siyaggaw hi Yusup piyaglibutan,
ampa siya piyagtabang-tabangan.
Siyaggaw hi Yusup hiyubuan.

Hiyubuan nila in badjù.
Pa lawm kàlì siya tilù.
Similawak siya nagtuyù.
Pa Tuhan siya nangayù.

Kalì malawn in hiyulugan.
Patayun siya hapdì pasaran.
Walà sin Tuhan diyulan.
Pindahan sila pikilan.

Manga magulang niya nangabughù
pasal malingkat sadja in badjù.
Katan sila dimugal landù.
Liyakat nila in badjù sin dugù.

Dugù hayup in piyanglakat
sin badjù hi Yusup malingkat.
Ampa sila nag-isun mawpakkat,
ha amà dè magpaingat.

Sà Tuhan in nagjajaga.
Pikilan nila napinda.
Nagbalik nag-isun sila.
Pa maglilitu diyagang nila.

Diyagang nila pilak kawhaan.
Tau Misir in tiyudjuhan.
Hi Yusup jiyagahan sin Tuhan.
Pakain-pakain wala siya piyasaran.

Amà hi Yusup nagkarukkaan
ha anak niya kalasahan.
Diya nila in badjù bat kakilahan,
nalalakat sin dugù katiluagan.

Amu ini in baytā nila,
"In badjū ini kan Yusup na.
Walā namū na kiyabaakan siya.
Inday bang hariin na."

Sā in badjū ini kakilahan namū.
Hi Yusup tuud in tagsukū.
Minsan ini nalalakat sin dugū,
way na tuud dugaing tagbadjū.

In amā maas nagmatay.
Nabag-bag tuud in lawm atay.
Naglawag siya nagkātay.
Walā kiyabakan in bangkay.

KAKADTU HI YUSUP PA MISIR

Hi Yusup yadtu na ha Misir,
diyagang sin taymanghud huwas namikil,
"Hi Yusup marayaw in kawl-piil,
bukun siya tau jāhil."

Hi Yusup kiyaragang pa kapitan,
pa astanà sin sultan.
In kapitan landù kiyugan,
sabab hi Yusup kapangandulan.

In lingkát hi Yusup dî kapintasan.
Miyayà kaniya in asawa sin kapitan.
Dî mayan siya mayà kumpitan,
liyagan siya dusa piyatuntutan.

Ampa siya diya pakasigpitan.
Diya siya madtu sin tindug sin kapitan,
pa lawm kalabus pagnganan.
Didtu siya piyatimpuhan.

Didtu siya timpuhan ha kalabusu.
In hi Yusup nahalubilu.
Sà in Tuhan dî magpanipu.
Nahinang siya jaga pilisu.

Pilisu, siya in nagjaga.
Ganti siya ha kapala.
In hinang niya nagmanda.
Katan piyangandul kaniya.

TAAWILAN HI YUSUP

Didtu awn duwa pilisu,
iban niya nakalabusu.
Nanagainup sila makainu-inu.
Kan Yusup nila piyangaru.

In muna-muna madtu nangaru,
bakas wakil sin sultan nag-umbulsatu.
"Hangkan," laung niya, "nasusa aku,
sin kabii awn tagainup ku."

Amu agi, "In muna-muna ku kiyakitaan,
awn bagun, tu in sanga, hangka tubuan.
Landù masiglà nagbunga ampa nagbukul
sakali in bunga nahinang anggul.

Duun isab in sawan sin sultan

ha lima ku iyuulinan.

Kiyawà ku in anggul piyugà pa lawm sawan,
ampa ku tiyukbal madtu pa sultan."

In sambung hi Yusup landù marayaw.

Laung niya, "In tu sanga amu in tu adlaw.

Ha lawm sin tu adlaw in ikaw makaguwà na,
iban pa hinang mu makabing na."

In simunù nangasubu amu in hambuuk wakil.

Namaytà timumpay walà nagpikil.

"Awn ini isab tagainup ku hipataawil.

Pahatiha aku bang unu in taawil.

Amu agi, "Ini isab in tagainup ku.

Awn tu ambung putì liyulutu ku.

Ha dapit pa taas jinisan kakaun hihipù ku.

Harap pa sultan hipanglabut ku.

Sakali amu sa ini in nakamula.
Kiyaun sin manuk-manuk bukun na pila.
Katan kakaun iyubus nila.
Landù tuud in pikilan ku simusa."

Biyaytà na hi Yusup in bissara bunnal,
"Bang aku in tumaawil iban mangannal,
hibungat ku kaymu landù masukkal.
Dí ku isab hibaytà, ikaw dumugal.

Ampa in tu ambung amu in tu adlaw.
Baytà sin taawilan biyà makahanggaw.
Ha lawm tu adlaw ini gantungun kaw.
Ubus, kudjutun, patayun pa kaw."

In katan tiyugilà.
Hi Yusup walà nagpahabà.
Mattan tuud in baytà.
In katan piyanyatà.

Taawil biyaytaan sin katutuuran.
Hi Yusup bunnal matuman.
Duun nila kiyapamintangan.
Katan sin biyaytà niya nagmattan.

Manjari nanagainup na isab in tuwan sultan.
Ha lawm katugan siya kiyasàbuan.
Duun ha astanà niya nakasabtan.
Way ruun tau makabaytà sin mattan.

Didtu kunù ha subà tungud
awn pitu sapi mahambug.
Manjari in pitu sapi mahambug
nakaun sin pitu sapi makayug.

Ubus, kītà niya kunù didtu ha uma,
awn pay marayaw nagbubunga.
Pitu in taud sin bunga,
mahambug sama-sama.

Ubus, ampa kiyasublihan
sin pitu pay sakitan.
Tandà sin kakayugan,
way unud kakitaan.

Na in sultan nahiluhala
ha tagainup niya kiyubla.
Katan guru piyakawa
nagpataawil. Way makabayta.

Awn nakabayta ha sultan
hi Yusup da in matuman.
Bakas na kiyasulayan,
siya in makabayta sin mattan.

In hi Yusup napipilisu.
Duun siya ha lawm kalabusu.
Piyakawa na siya madtu,
pataawilun sin amu.

Namaytā na hi Yusup sin mattan,
amu agi, "Ampun ha sultan,
in aku way kaingatan,
sà in taawil yan dayn ha Tuhan.

Amu ini in baytā bang ku pikilun.
Awn pitu katahun masambu in pagtanum.
Ubus, sumubli in gutum,
lumugay pitu tahun.

Wajib na kaw bihaun magmanda,
in katan papag-umaha.
Ubus, pataura in budiga,
pagtaw-an sin maani nila.

Kiyasulutan landù in sultan.
Hīnang hi Yusup pāngandulan.
Landù tuud in sultan kiyaamuhan
dihilan hi Yusup kalagguan.

KALAGGUAN HI YUSUP

Hīnang hi Yusup gubnūl dakulà.
Duun ha Misir, siya in makapagbayà.
Biyungsuran sin sultan sin artà
dayn ha bay sampay pa lupà.

Ampa siya piyaasawa sin sultan
pa hambuuk budjang, anak sin Imam.
Duwa in anak nila katan
hi Ipraim iban hi Manassa in ngan.

Hi Yusup nagulal gubnūl,
ampa katluan tahun in ummul.
In sultan kaniya nangandul.
Pag-uma, siya in nagmandul.

Pitung katahun nagpauma,
baran sin gubnūl in nagmanda.
Katan piyapaghinang niya,
usug-babai piyapagsama-sama.

Pag-ubus sin pitu tahun,
dimatung na in gutum.
Amura taga kakaun,
ha Misir mataud bugas iban gandum.

Gutum ini landù dakulà.
Kiyasigpitan in mahadjanà.
Diyagang in manga artà,
natikmud sampay pa lupà.

Ubus man diyagang katan,
diyagang sampay baran.
Tub-tub na sin kasigpitan,
nabanyagà sin kahapdian.

KARATUNG SIN TAYMANGHUD HI YUSUP PA MISIR

Amu ini in gutum ha Kanaan,
amu in hulà hi Yusup piyag-anakan.
In manusiyà duun kiyasigpitan.
Way na kakaun kabaakan.

In hulà Kanaan hulà hi Yàkub,
amu in amà sin gubnul ha Misir bantug.
Taymanghud niya hangpù tagduwa in taud
duun ha amà naghuhulà tungud.

In amà hi Yusup maas na.
In kagutuman nakalandù na.
In hangpù anak naglunsulan na.
Miyadtu pa Misir nami kakaun nila.

Na miyadtu na sila limud
ha kurà hangpù in taud.
Pagdatung nila way paghantang tindug,
timuy sila pa gubnul ampa simujud.

Ubus nila man simujud,
ampa sila limuhud.
Ampa na sila namaytà sin maksud,
in sila giyutum tuud.

Mangayd tuud sila tulung,
pa gubnul mikiulung.
In sila mami kakaun
duun ha hulà yaun.

Magtuy sila piyaghibukan
sin gubnul dakulà kalumanan.
Walà nila na kiyakilahan,
amu in manghud nila liyaugan.

Na, in gubnul naghibukan,
amu agi, "Kamu mangì pikilan!
Gawi niyu mari katipuhan.
Ispay kamu yan, subay pahukutan."

Na namidpid na sila namaylu.
Amu agi, in sila mahatul tau.
Bukun nila gawi manipu.
Gawi nila mami gastu.

Tu adlaw sila tiyahan
hipù na sin kasusahan,
ampa nila kiyatumtuman
-in dusa nila sin liyabayan.

Namung na sila iban susun katan,
in sila biyusung landù sin Tuhan
sabab nanglaug sila ha liyabayan.
Manghud nila in siyulayan.

In katan bissara susun nila,
hi Yusup diyurungug sila.
Sà walà siya nagpatilas kanila
sin makahati siya sin bissara nila.

Pag-ubus ampa sila siyumariya,
sin gubnùl kapala nagjùlbahasa.
Bahasa Misir in bissara nila,
supaya dî kakilahan siya.

Siyumariya na sila katan,
pabaytaun sin mattan,
supaya di sila katimpuhan,
kalabusuhun kasaummulan.

Namaytâ na sila sin kasabunnalan,
in sila dayn ha Kanaan.
In amâ nila hi Yâkub in ngan.
Hi Benjamin in kamanghuran.

Hi Benjamin in manghud namû,
yadtu kan amâ timutunggû.
Maas na siya tuud landu.
In kagutuman way hisunû.

In gubnul nakatindug,
himarap pa bilik simud,
pa kulangan dimaub.
Nagtangis siya tuud.

Timangis siya biyà batà-batà.

Tuhan da in nakakità.

In luhà niya bukun na gantà,

dayn ha mata gimuwà.

Tiyupusan niya naa in luhà,

ampa siya miyanaw pa guwà.

Walà siya nagpakità

ha manga magulang niya jahulakà.

Nag-us-us niya tiyupusan*

in luhà nabiyà ulan,

supaya siya dî kaingatan

sin manga magulang niya katan.

DAAKAN HI YUSUP HIPAKAWÀ HI BINJAMIN

Pag-ubus naghinang sila parjanjian,

ha walà pa siya kiyakilahan.

"Bang niyu aku putingan,

hukutan ta kamu katan.

Amu ini in janjì taniyu
bang bunnal in agi niyu
sin awn pa taymanghud niyu,
daha niyu mari kitaun ku.

Sà in taymanghud niyu hi Simiyun,
dī ku siya muna tahanun.
Bang hi Binjamin mari dāhun,
magdungan na sila pauwiun.

Ampa hi Simiyun hiyukutan
sin gubnul giyakutan.
In taymanghud niya katan
nakatangis na iban.

Ampa na sila minig
dayn ha gubnul namaid.
In tingug nila namimidpid,
sà luhà magkaligid.

Nami na sila kakaun
amu in bugas iban gandum.
Pa hulà nila dāhun,
hinangun nila balanjà duun.

Ampa sila nangurà,
in kakaun kiyawà.
Dāhun nila pa hulà,
hinangun nila balanjà.

Pag-abut nila pa gítung dan,
in kurà nila niyaugan.
Kimaun himali sila katan
supaya dī lammahan.

Kapanyapan kakaun
ha karut liyuluun,
amu in nabi nila duun
supaya dī hapdiun.

Sakali pag-ukay nila
nainu-inu tuud sila.
In hambuuk karut kītā nila
awn sīn kiyabaakan nila.

BAYTÀ SIN TAYMANGHUD KAN AMÀ NILA

Pag-abut nila pa hulà
tuy nahiluhala.
Ha amà namaytā
in parinta sin gubnūl makabugà.

Amu agi, "Sampay, Amà, in tandà,
hi Simiyun hiyukutan kiyawà
sakawkat kami nakabaytā
sin awn manghud namù dī ha hulà.

Amu in kabaytā namù
way bissara malanù.
Na, miyugà kami landù
iban ispay kami kunù.

Timuyù kami namaylu,
in kami mahatul tau.
Sà in pasù sin u,
tiyahan da kami didtu.

Na, in piyauwì na kami,
piyajanjì pa kami,
sin gubnul, amu agi,
'Subay hi Binjamin dāhun mari.'

Subay hi Binjamin madtu dāhun
ampa hi Simiyun paguwaun.
Pauwiun siya dayn duun,
magdungan na kami pakariun."

In amà natahamul,
himangad iban dumul.
Wayruun tuud kawì.
In lawm atay hansul.

Amu agi sin amà,
"Dì ku hikatugilà.
Bang hi Benjamin malawà
in ummul ku makawà.

Ubus mayan nagbaytà,
iyukay na in altà.
Sakali ini pagkità,
in sīn bukun gantà.

Na, kiyawà nila na in kakaun
ampa in sīn tīpun
amu in liyuluun duun
ampa sila nagkaun.

Nakaubus mayan sila
ampa sila nagbissara.
In amà hiyupù-hupuan na
sin hi Benjamin paagarun nila.

Malugay man duun,
nakatangù na huun.
"Sà ayaw niyu binan bitun.
Subay niyu ra pæagarun."

KAAGAD HI BINJAMIN PA MISIR

Hi Binjamin nara nila
pa Misir piyaagad na.
In sīn kiyabaakan nila
pa gubnul iyulì da.

Sà in kakadtu nila,
sasampangan nagdara,
ginisan inda-lupa,
anggul iban manga lana.

In lana pagnganan,
hamut dī kapan-panan.
Minsan in liyuluunan,
lingkat dī kanganan.

Iban in manga sīn iyulì,
walà nila kiyulì.
Bukun sila sahilì.
Ha gubnul naghahallì.

In sīn iyulì na,
līpat makaruwa.
Amu kabugaan nila
sin binasahun sila.

Pagdatung nila mayan,
pa Misir ha halaman.
Amu na in tiyuyan,
upis sin gubnul kalumanan.

Katan sila magtaymanghud
nanuytuy pa upis simūd,
harap pa gubnul limuhud,
iyagad in u siyujud.

PAGKITÀ HI YUSUP KAN BINJAMIN

Pagkità hi Yusup ha manghud niya
way minsan nagbissara.
Sà in lawm atay nalaga
sabab sin ulung niya.

Ubus tiyawag niya na madtu
in tindug niya umbulsatu.
"Uwì na kaw muna madtu.
Sila in paagara niyu.

Subay mu ini tumtumun.
Hinang kaw mataud kakaun.
Bukun sadja aku in parulihun.
Sila ini katan lapayun.

Kakaun bukun mangì.
Sumbay kaw manga sapi.
Lugay nila duun humanti,
kakaun yan hipagbakti."

Na, miyanaw na sila madtu
pa bay sin gubnul umbulsatu.
Sà karuk sila nainu-inu
in dusa nila bang unu.

Pagdatung nila mayan
pa bay sin gubnul dakagan
tiyuy nila iyan
in hambuuk pāngandulan.

Ampa nila iyasubu,
"Bang in dusa namù unu.
Diya kami dayn didtu,
harap mari hipaunu?

Hangkan namù iyulì in sīn kiyabaakan
maray kami sin tau liyaugan.
Gubnul pa in diyuhalan
sà dī niya na pag-iyanan."

Na biyaytaan na sila madtu-madtu,

"Dī san binsanaun kamu.

In sīn amu in piyamimi niyu,

yari na natabuk, nakawà ku."

Sartà kiyawà na in taymanghud nila

amu in hi Simiyun binin nila.

Panhid hukut in baran niya.

Landù sila kiyublaan bang unu in dusa.

Ubus, diya sila pa lawm bay ībanan

ampa dihilan tubig bat siki nila kahugasan.

Mahuli, in pāngandulan hi Yusup nagpikilan.

Piyakaun in manga kurà siyasakatan.

Ampa nila siyakap in sasampangan

hidihil kan Yusup bat panumtuman.

Asal nila diyungug in hilaalaungan,

bang maugtu in suga labutun sila katan.

Manjari naabut mayan mataas suga,
piyabay na in gubnol iban nag-asubu na
bang biyà diin in kahalan sin amà nila.
Mabayà siya makaingat bang buhì pa.

Ampa sila namichara
"Tuwan Gubnol Kapala,
in amà namò buhì pa.
In baran niya makasay da.

Pag-ubus hi Yusup namariksà
sin manghud niya bang hariin tà,
simud siya pa bilik simigla.
In luhà niya napakpak bukun nagantà.

Bat da siya di kabistuhan
tiyawag niya na pakaurun katan.
Amu sa ini kiyainu-inuhan
in paglingkud nila nagsunud-sunud ha lamisahan.

Hambuuk kiyainu-inuhan nila duun
in paglingkud nila nagsususun-susun.
Iban in pagdihil kanila kakaun
harap madtu pa manghud, mataud hakutun.

IN SAWAN HI YUSUP

Ubus mayan sila nagkaun,
tiyawag na sin gubnul in manga daraakun.
"Kaa niyu in karut nila butangi kakaun.
Pataura niyu tuud iban hipuun.

Sà, awn yadtu pilak ku sawan.
Kaa niyu madtu agaran luunan.
Sà didtu niyu man yan butangan
ha karut diyara sin kamanghuran."

Ubus mayan liyuunan in karut nila,
piyauwì na sila ampa piyara.
Nakalayù-layù man dayn ha दौरा,
sin sundalu sin gubnul iyapas sila.

Amu agi kanila, "Huy kari kamu,
katan kamu manga panipu.
Bukun marayaw in akkal niyu.
In artà sin gubnul kiyawà niyu."

Namaylu tuud sila timuyù.
Sartà simabbut pa Tuhan natù.
"Minsan kamu sumapa, ukayun namù.
Hisiyu-siyu in nagdara, ĩpunun namù."

"Amu ini in janjì namù, huun.
Sulayan niyu na kitaun duun.
Bang niyu kabaakan, makajari niyu bunuun
in nagdara sin artà yan bang duun."

Na, iyukay na in karut nila hambuuk-hambuuk.
Liyawag na in sawan madtu biyatuk.
Sakali didtu nakabubutang ha lawm karut,
diyara sin kamanghuran nila walà nakahibuk.

Diya na sila pa gubnol nagbing.
Duun sila ha bay piyulin.
Limingì tuu-lawa sila manghing-hing.
Mataud tuud tau kanila timanding.

Pagdatung nila mayan mawh pa kapala
amu in gubnol nagpaapas kanila
duun na sila dimaawa.
"Unu-unu in hibutang mu kami lillà na.

Maglillà kami tuud gubnol sin sarà mu
unu-unu in parinta hibutang mu.
Hangkan nasà kami miyagad mari kaymu,
bang kami nakadusa bayà-bayà mu."

Na in gubnol magtuy imiyan,
"Li kamu sarupun binsanaun katan.
Sà amura pa ihua ku in kiyamettanan,
Pinasahun ku dī iban hukutan."

"Na, bang hi Benjamin dī binasahun,
dimì na kami katan umunung.
In taymanghud yan makaulung
amu in magtutunggù kan amà mag-uunung.

Sabab in amà namù maas na
iban anak niya hambuuk miyatay na.
Bang hi Benjamin makabin na,
maray amu in hikamatay kaniya.

Hi amà asal liyulutangan in atay
pasal sin awn taymanghud namù miyatay.
Hiyapus siya tuud nagkatay.
Walà niya kiyabaakan in bangkay."

Na, in gubnùl nahansul tuud.
Miyagad sampay tubig mata imanud.
In bichara niya dī na kahawiran.
Subay na in taymanghud niya baytaan.

PAGPAKILAL HI YUSUP

Ampa na siya nanggalit iban imiyan.
Tiyawag niya in tindug niya katan.
"Paiga niyu kunu in tau ha kakid-kiran
amu in nangingita-ngita duun hayan.

Na, sila-sila na sadja in nagtipun.
Minsan hi siyu tau di makakawn.
Dayn duun baytaan niya na pahatihun
hangkan sila hīnang bihaun.

"Yan pangitaan ku kaniyu,
bang napinda ka in akkal niyu.
Sabab in nakauna awn liyaugan niyu,
hambuuk tau piyagdagang niyu.

Na yan kitaun ta kamu
bang biya diin in atay niyu
bang napinda na in pangannal niyu.
Minsan taymanghud laugan niyu.

Na, bihaun magsukul aku
sin dî niyu pasaran in manghud niyu.
Minsan siya mabinsanà unungan niyu.
Ayaw kamu mabugà. Dî aku mag-unu.

In kug ku-yan kitaniyu nagkità
sabab in kitaniyu hangka amà.
Aku na in taymanghud niyu nalawà
amu in diyagang niyu pa dugaing hulà.

Aku na ini hi Yusup taymanghud niyu
amu in binsanà piyasakitan niyu.
Sà bukun kabayaan sin Tuhan aku mapatay niyu.
Hinang aku tau dakulà tumabang kaniyu."

Hi Yusup landù tuud kiyugan.
In luhà niya nabiyà ulan.
Similawak siya, dî makatahan.
Biyà sakit dakulà in kimugdan.

In tanug sin tangis iban paghibuk
kiyarungugan sin tau malayù masuuk.
Sampay pa bay sin sultan Pir-awn
in tingug niya diyungug mawn.

Ubus, ampa niya giyul-gul
in hambuuk taymanghud niya subul.
"Pa Tuhan kitaniyu tuud magsukul
sin nag-abut pa kitaniyu ummul."

Hi Binjamin subul taymanghud nila
walà nakakawì nakabissara.
Siyum giyul-gul tuud siya
sin hambuuk gubnul magulang niya.

Hi Gubnul Yusup kiyakilahan na
sin katan taymanghud niya.
Walà na sila nakabissara,
namid-pid katan sama-sama.

Pag-ubus ampa in gubnul imiyan

"Magsukul tuud aku pa Tuhan.

Tagainup ku sin liyabayan,

bihaun nasampurnà na katan.

Landù kitaniyu tuud magsukul

pa Tuhan hīnang aku gubnūl.

Di ha hulà Misir aku in nagpaintul.

Sin manusiyà katan aku in nagpahatul."

Duun mayan sila nagbibissara,

awn tindug sin sultan kītà sila.

Miyadtu pa sultan ampa biyaytā sila,

in manga tau taymanghud niya.

Magtuy nimaug in sultan.

Piyabay sin gubnūl gimaban.

Amu agi, "Hambà muna tuwī laugan

in manga taymanghud mu katan."

Ampa hi Yusup iyan sin sultan,
"Unu na in hinangun mu ha taymanghud mu yan?
Sarang mu yan dihilan parasahan,
parihun mu maghulà bat mu kakitaan."

Imiyan na in gubnu1, "Uwì na kamu
madtu pa Kanaan hulà taniyu.
Sà ayaw kamu maglallay dayn didtu.
Bing kamu masamut. Hi amà paagara niyu.

Kari na kamu kakù katan.
Di ta na kamu ipatun jagahan.
In artà ditun, ayaw niyu binan.
Dihilan ta kamu lupà di pangabuhianan.

Na, minuwi mayan sila,
ginisan in kakaun piyara.
Pagtamung sila dihilan pa
sà in kan Benjamin līpat makalima.

Mabanus kakaun dihil kanila.
Kawhaan in kurà dima.
Kurà usug-umagak dima sama-sama.
Hiyatud pa Kanaan hulà nila.

Iban pa isab manga kalisa
sin sultan kanila piyara
pagluwanan sin kapanyapan nila
supaya way makapin, katan mara.

Pagdatung nila mayan pa Kanaan,
tuy na in amà nila biyaytaan.
Hi Yàkub magtuy kiyublaan.
Dì siya magkahagad bang dì kakitaan.

Subay niya kità in manga kalisa
sin sultan ha Misir piyara kanila.
Kapanyapan nila katan hipara.
Way hipakapin, subay katan mara.

Na, hi Yàkub landù tuud kiyublà
pagdungug niya man sin habal baytà
sin hi Yusup nahinang gubnul dakulà.
Duun ha hulà Misir siya makapagbayà.

In gubnul pa amà nagpabaytà pa,
"Awn pa lima tahun kita masusa.
"
In lima tahun pag-iyangun yan gutum da.
In pagkaun taniyu sandalan ta pa.

Bunnal, Amà, in baytà yan,
Makaluuy in manusiyà katan.
Unu na bahà, Amà, in kimugdan?
In tau mapatay ha kahapdian."

Hi Yàkub magtuy da kiyugan
sin hi Yusup awn gulalan,
hinang tau dakulà sin sultan
amu in piyapagbayà sin artà katan.

Duun mayan sila nagtitipun,
iyukay na in diyara nila kakaun.
Ubos ampa sila isab nag-isun,
katan artà nila pa Misir dāhun.

MAGLAYN HINDA YĀKUB PA MISIR

Pa Misir nila na liyuwan
in artà nila diya katan.
Dayn ha bay pa lupà walà kiyapinan
sampay pa bili-bili amu in buyan.

Nakaratung mayan sila mawn,
harap pa bay sin gubnol kanila nagtugun.
Pagkità hi Yusup, tuy na miyawn,
biyak in amà niya, giyul-gul siyum.

Duun man sila naglilingkud,
gubnol di na makatunà, kiyugan tuud.
"In bissara ku ini bukun langug,
landò tuud ako nahipò kug."

Marayw niyu na kadtuun
in sultan pahatihun.
Bang siya tumgangù na huun,
tipunun ta na kamu dī palihalaun.

Bang kamu sin sultan asubuhun
sin hal niyu, pabaytaun.
In sambung niyu ha ampun,
"In kami ini lumag kakaun.

In hulà namù duun ha Kanaan
mahunit namù na tuud sandalan.
Sin gutum miyatay in kasagbutan,
bili-bili timahan, way na kapakaunan.

Tag-ipun kami miyari
ha ampun kami magpaparuli.
Bang ampun biyà makajari,
in kami ini limihan dī."

Hi Yusup nagpanaw-panaw na.

In atay niya masannang na.

In amà niya yaun na

iban sin manga taymanghud niya.

In sultan biyaytaan niya

pasal sin maas taymanghud niya.

"Bang mu sila dulan na

in sangdulan baran ku na.

In hulà nila ha Kanaan

hapdì dì na kasandalan.

Katan sin ipatan,

yan na piyahukutan."

Simambung na in sultan,

"Dì ta kaw parapatan,

Hangkan ta na kaw dihilan.

Ikaw in makapagbayà katan.

Na, bang kabayaan mu,
sumaggà, dì sa aku.
Ayaw maas-taymanghud mu,
katan, bayà-bayà mu!"

Sultan walà simaggà.
Katan siya piyapagbayà.
Sambung niya masiglà,
"Ikaw na in magbayà.

Yusup, tuud parayawa.
Hinda amà mu tabuka.
Hulà, sila papagpia
sin katanaman nila.

In hulà Misir ini,
ikaw in nagparuli.
Hinda amà mu, dihili
pag-ipatan nila bili-bili."

Pag-puas dayn ha sultan,
hi Yusup nagsambatan.
"Lupà ta kamu amà dihilan.
Pì na kamu sin katanaman.

Pì na kamu madtu
sin katanaman niyu
amu in lupà umbulsatu
pagtanuman niyu."

In Misir iban Kanaan,
mahunit na tahanan.
Pagkaun kiyasigpitan,
way na kabakan.

Hi Yusup nagpikil,
naglibut sin pasisil.
Bissara niya piyagwakil,
in artà hiparihil.

"Subay niyu ini tumtumun,
In artà niyu tipunun.
Subay natù pūnun,
hipamī kakaun."

DIYAGANG IN KATAN ARTÀ

Pagka-isun tikmud na,
hi Yusup minuwi na.
In katan susa na.
In artà way na.

In katan nag-isun,
kan Yusup miyawn.
Duun sila nagtipun
sīn paglawag kakaun.

In kaibanan naggawi,
kan Yusup nag-agi.
Tabanga tuud kami.
Way na sīn hipamī.

Hi Yusup nagsambatan,
"Bang artà kiyasigpitan,
daha niyu mari in ipatan.
Aku in magpikilan."

Minsan ipatan naubus
magsusung in kulang-kabus.
In katan napus-pus,
sin nakurà naapus.

In katan artà nahakut,
diyagang kan Yusup.
Sampay artà pusakà, naubus.
Way na hipamī, kulang-kabus.

Amura walà kiyaragang,
hulà sin kaimaman.
Pasal sin kapatutan
dīhil sin sultan.

Hi Yusup nagpikilan,
"Subay lupà bakalan.
Tau ha katiluagan,
binhì, subay dihilan.

Dì na kita lugayan,
timigdà na in ulan.
In pagkaun kabaakan.
Awn na katanuman.

Bang mag-ani, tumtumun,
in sultan pahampitun.
In binhì kiyatanum,
dayn ha sultan in puun.

Hi Yàkub nakalallay,
ha Misir nakasulay.
Hangpù tagpitu tahun in lugay,
ha gutum walà miyatay.

KAMATAY KAN YÀKUB

Pagka hi Yàkub maas na,
hanggatus kàpatan tagpitu tahun in ummul niya,
hi Yusup tiyugun na.
Sartà dimatung na.

In maksud tiyugilà
ha anak gubnul dakulà,
"Ayaw man kaw makublà.
Ummul ku bukun na mahabà.

Subay mu aku dahun
pa hulà natù puun.
Bang in ummul ku kawaun
kubulan aku duun.

Didtu mu aku tuud kubulan.
Ha daig hi amà tampatan.
Ay mu tuud aku dī tanuman.
Subay ra tuud didtu ha Kanaan."

Hi Yusup simambung na, "Huun,
pa hulà ta kaw tuud dāhun.
Bang sin Tuhan in ummul mu kawaun,
di ta kaw hitanum dī pabinun.

Amu ini, amà, in janjì ku,
katan sin bissara mu agarun ku.
Agaran ku pasapa ini kaymu,
bat da dī mangdà-dà in atay mu."

In hi Yākub imanduk ampa simambahayang
iban kiyaguwàniya na in lapal kabtangan.
Ubus na siya, sin anak niya siyambungan.
Agarun na tuud in lapal kabtangan.

"Sà in kamu yan makabin na
bang in baran ku makauna na.
Sà in Tuhan amu kawasa,
siya da in makahàwas kaniyu dayn ha dusa."

Manjari tiyawag na hi Yàkub in katan
manga anak niya tuud kaūgan.

"Kari kamu pa daig ku ampa ta kamu nasihatatan.
Dunguga niyu marayaw bang biyà matuman.

NASIHAT HI YÀKUB HA GUBNUL

Yusup kalasahan kaw landù sin Tuhan.
Pakain-pakain dī niya kaw butasan.
Hangkan pangayuun ku, dihili kaampunan
in manga taymanghud mu katan.

Dusa nila limabay, ampuna,
papasi ha atay mu, lupaha na,
supaya maig in hanggaw nila.
In kamu magtaymanghud magkasi-lasa.

Timangis in gubnul ampa sila siyum.
Dī tuud sila pakabugaun.
Way katipuhan ha sungun,
malaingkan jagahan sila palihalaun.

Walà limugay hi Yàkub naabut na.
Piyakapul ha duktur in baran niya.
In manga anak apù niya,
kàpatan adlaw nagjamu nagduwaa.

Nagduwaa, ubus mayan,
kiyubul nila madtu pa Kanaan.
Mabanus tau miyagad imiban,
iban na sin manga kanakuraan.

Ha kalisa in liyuwanan.
Manga kurà in timundan.
Harap tudju pa Kanaan
pa tempat sin kamaasan.

KAWAPAT KAN YUSUP

Pagka nakalugay na,
in gubnul limaas na.
Hanggatus taghangpù tahun in ummul niya.
In anak apù piyūn na.

Piyūn sila ampa biyaytaan,
amu agi, "Dī kamu sin Tuhan pasaran.
Ha susungun tahun kamu dayn dī īgan.
Dāhun da kamu pa hulà ta Kanaan.

Amu ini in bīn tugun ku.
Kalia niyu in kubul ku.
Bukug ku daha niyu.
Didtu ha daig hi amà tampatan niyu."

Katan baytā hi Yusup nabunnal da.
Dimatung in waktu nasampurnà da.
Pini sin Tuhan hi Nabi Musa,
dihilan kawasa dima kanila.

Diya sila katan pa Kanaan
amu in hulà sin kaapù-apuan.
Kiyajanjī hirihil kanila sin Tuhan,
dayn kan Ibrahim kaapù-apuan.

26.9-373-5.1C

13.120P-36005NCP

Printed in the Philippines